



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
11 Jullu 2014

**Ministériu Públiku alega pena prizaun tinan 5 ba arguidu kazu krime tentativa omisídiu
ho natureza violénsia doméstika**

Iha 08 Jullu 2014, Tribunál Distritál Baucau hala'o julgamentu ho agenda produsaun ba provas ba kazu tentativa omisídiu ne'ebé involve arguidu AdCM hasoru nia feen, iha 29 Novembru 2012, iha Sub - Distritu Baguia, Distritu Baucau.

Iha alegasaun finál, ministériu públiku husu ba tribunál atu kondena arguidu ho pena prizaun tinan 5 tanba konsidera faktus provadu sira hanesan baku lezada dala rua (2) ho katana no taa dala ida (1) iha lezada nia kanuruk. Entretantu parte defeza husu tribunál atu aplika pena adekuaudu tanba arguidu laiha intensaun atu taa lezada.

“JSMP enkoraza tribunál atu konsidera faktu provadus sira ne'ebé produz durante julgamentu, liu-liu sirkunstansia agravantes sira ne'ebé asosiadu ho krime ne'e, atu halo desizaun ne'ebé ekulíbriu ho nivel gravidade hosi krime ne'e,” dehan Diretór Ezekutivu JSMP, Luis de Oliveira Sampaio.

Ministériu Públiku akuza katak iha 29 Novembru 2012, maizumenus iha tuku 18:00, lezada diskuti malu ho nia banin feto tanba laiha hahan. Depois diskuti malu lezada hamutuk ho nia oan na'in rua halai ba iha nia inan aman sira. Arguidu tuir kedas lezada ba iha nia inan aman no baku dala rua ho katana nia belar iha lezada nia kotuk laran. Iha momentu ne'ebá lezada tenta halai maibé arguidu duni tuir no taa dala ida iha lezada nia kanuruk. Aktu ne'e rezulta lezada hetan kanek iha kanuruk, sofre tilun diuk nomós nakdedar wainhira kaolia.

Ministériu Públiku akuza arguidu kontra artigu 138 Kódigu Pénal kona-ba omisídiu simples no artigu 23 Kódigu Pénal kona-ba tentativa konjugadu ho artigu 35 Lei Kontra Violénsia Doméstika.

Iha produsaun ba provas, arguidu deklara katak nia la baku iha lezada nia kotuk laran maibé baku iha ain kabun dala rua. Arguidu mós deklara katak kanek iha kakorok tanba sira hadau malu katana nune'e katana kona iha lezada nia kanuruk. Aleinde ne'e, arguidu mós deklara katak nia la duni lezada hodi taa lezada.

Iha parte seluk, lezada deklara katak iha momentu ne'ebá, nia ba halo tuir adat iha nia inan aman sira nia uma. Iha tempu hanesan, lezada ko'us hela sira nia oan no ku'u hela ainanas, derepente

arguidu ho katana nia belar baku dala rua iha nia kotuk laran. Tanba ne'e lezada halai no arguidu duni tuir no taa dala ida iha nia kanuruk.

Entretantu testamuña MB depoimenta katak nia hare arguidu ho katana nia belar baku dala rua iha lezada nia kidan no hare lezada halai maibé arguidu nafatin duni tuir no taa iha lezada nia kanuruk.

Iha kazu ne'e, JSMP observa katak arguidu kuaze nega hotu faktu sira ne'ebé akuza ba nia no deklar faktu seluk tuir nia versaun. JSMP hein katak tribunál bele konsidera faktu sira ne'e hamutuk ho faktu sira seluk liu-liu konsekuensia ne'ebé lezada hetan depoisde akontesimentu ne'e.

Depois de alegasaun finál, tribunál marka fila fali ba 30 Jullu 2014, tuku 14:30 lorokraik hodi rona leitura akordaun.

Julgamentu ne'e prezide husi juis koleтиву ne'ebé kompostu husi Dr. Afonso Carmona, Dr. Hugo da Cruz Pui no Dr. José Gonsalves. Minstériu Públiku reprezenta husi Dr. Aderito Tilman no arguidu hetan defeza husi Dr. Grigorio de Lima husi Defensória Públiku.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883|77295795 Website: www.jsmp.tl

Facebook: www.facebook.com/timorleste.jsmp

Twitter: @JSMPtl